

四庫全書

集部

欽定四庫全書

集部

梅村集

御製詩
卷一至四

詳校官內閣中書臣陸湘

助教臣常循覆勘

總校官知縣臣楊懋珩

校對官中書臣程瑛

謄錄監生臣徐芑

御題梅村集

梅村一卷足風流
往復披尋未肯休
秋水精神香雪句
西崑幽思杜陵愁
裁成蜀錦應慚麗
細比春蠶好更抽
寒夜短檠相對處
幾多詩興為君收

右謹依

御製樂善堂全集定本恭錄

欽定四庫全書

御製詩

欽定四庫全書

集部七

梅村集

別集類六

國朝

提要

臣等謹案梅村集四十卷

國朝吳偉業撰偉業字駿公號梅村太倉人前
明崇禎辛未以一甲第三人及第授翰林院
編修入

國朝官至國子監祭酒所作綏寇紀畧已別著

錄此乃其詩文全集凡詩十八卷詩餘二卷
文二十卷偉業少時即以詩名江左晚而壇
坵益高紙墨未乾遠近已爭相傳誦風流藻
采足以照映一時其詩調擷宮商濡染丹碧
風神韻致秀冶軼倫為從來罕有之標格而
最擅勝者尤在於七言歌行一體觀其緣情
托興即事抒懷促急管之繁聲動么弦之逸
響一唱三歎別具鑪錘元白以還一人而已

至其古體則往往近於偶儷殊非正格黃宗
義嘗稱梅村集中張南垣柳敬亭二傳張言
其藝而合於道柳言其參寧南軍事比之
魯仲連之排難解紛此等處皆失輕重為倒
却文章家架子其針砭之者頗當然諸文類
能稱心而出詞旨雅贍雖未可追躡前脩要
亦不失為才人之筆也乾隆四十六年十月

恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

梅村集卷一

國子監祭酒吳偉業撰

五言古詩一

贈蒼雪

我聞昆明水天花散無數躡足凌高峰了了見佛土法
師滇海來植杖渡相浦藤鞋負貝葉葉葉青蓮吐法航
下匡廬講室臨玄圃忽聞金焦鐘過江救諸苦中峰古

道場浮圖出平楚通泉繞堦除疏巖置廊廡同學有汰
公兩山聞法鼓天親偕無着一朝亡其伍獨游東海上
從者如墻堵迦文開十誦廣舌演四部設難何衡陽荅
疑劉少府人我將無同是非空諸所即今四海內道路
多豺虎師於高座上辦香祝君父欲使菩提樹徧蔭諸
國土洱水與蒼山佛教之齊魯一履游中原五嶽問諸
祖稽首香花嚴妙義足令古

塗松晚發

孤月倚一村寒潮自來去人語出短篷纜沒溪橋樹冒
霜發輕舫披衣聽雞曙簫響若鳴灘蘆洲疑驟雨漁因
入浦喧農或呼門懼居然見燈火市聲雜翁嫗水改村
店移一帆今始遇生涯問菰蒲世事隔沮洳終當謝親
朋刺舟從此住

毛子晉齋中讀吳匏菴手抄宋謝翱西臺慟哭記
扁舟訪奇書夜月南湖宿主人開東軒磊落三萬軸別
皮加收藏前賢矜手錄北堂學士鈔南宋遺民牘言過

富春渚登望文山哭子陵留高臺西面滄江綠婦翁為
神仙天子共游學攜家就赤城高舉凌黃鵠尚笑君房
癡寧甘子雲辱七里溪光清千仞松風謾廬陵赴急難
幕府從羈僕運去須武侯君存即文叔臣心誓弗諼漢
祚憂難復昆陽大雨風虎豹如蝟縮詭譎溱沔冰倉卒
蕪亭粥所以恢黃圖無乃資赤伏即今錢塘潮莫救厓
山麓空坑戰士盡柴市孤臣幾一死之靡他百身其奚
贖龔生天天年翟公湛家族會稽處士星求死得亦足

安能期故人共卧容加腹巢許而蕭曹遭遇全高躅文
山竟以殉趙社終為屋海上悲田橫國中痛王蠋門人
萬里歌故吏平陵曲彼存君臣義此製朋友服相國誠
知人舉事何顛蹙丈夫失時命無以辭碌碌看君書一
編俾我愁千斛禹績荒烟霞越臺走麋鹿不圖疊山傳
再向嚴灘續配食從方千豐碑繼梅福主人更命酒哀
吟同擊筑四坐皆涕零霜風激羣木嗟乎誠義士已矣
不忍讀

壽王鑑明五十

伏勝謝生徒開壁藏卷軸桓榮抱詩書拾耜逃巖谷
來兩經生遭亂耽講讀後皆保耆頤或乃致鼎足當世
數大儒如君號名宿通識曉世變早計駭愚俗一朝載
妻子推車入天目經營志不遂退廼就田牧十畝種桑
麻一溪蒔花木果茹飴兒孫樵蘇課僮僕以代子陵釣
無媿君平卜俯視悠悠人愁苦對金玉下士豈聞道世
事如轉轂五十知天命養生在無欲全家就白雲避地

驅黃犢無以侑君觴知足則不辱

松鼠

衝飈飄顙瓦壞墻叢廢棘謾然見松鼯搏樹向人立側
目仍盱眙奉頭似悚惕簷牙偃卧高屋角歌斜疾倒擁
弱枝危迅躡修柯直已墮復驚趨將藏又旁突去遠且
暫留迴顧再迸逸前逃赴已駛後竄追旋及剽輕固天
性儼狡因衆習兩木夾清漳槎牙斷尋尺攀緣所絕處
排空自騰擲足知萬物機飛走不以力嗟爾適何來鳥

鼠忽而一本是居嶄巖無端被羈繫兒曹初玩弄種類
漸充斥黠彼憑社徒技窮耻晝匿銜尾共呼鳴異穴為
主客吾廬枕荒江垂死倚病柏雷雨撥其根慄裂蒼皮
濕空腹鷓鴣蹲殘身螻蟻食社鬼不復憑乘間恣出入
庭中玉蘂枝怒茁遭狼藉非敢念摧殘於君奚損益屈
指五六年不遺一花白筍抽新芽編籬察行跡免彼
鉗鉏侵值爾齒牙厄反使盜者心笑睨生歎息貧賤有
此園謂可資溉植春蔬晚猶種夏果晨自摘鳥雀羣飛

鳴啁啾滿阡陌婦子懶驅除傳藁加臺笠我亦顧而笑
自信無長策馬能避穿墉會須憂入室茅齊雖云陋一
一經剪葺曉起看掃除仰視輒詫惜尋繩透簾幕掉尾
來几席倒庋傾圖書窺厨啖漿炙空倉喧夜闌忘疲競
遺粒早幸官吏租督責無餘積邂逅開虛堂羣怒扼險
塞地逼起衆呼拍手撼四壁捕此曷足多欲以觀其急
樗戶既嚴扃藥櫨若比櫛瞥眼條遁逃一巧先百密窮
追信非算允豫不早擊忍令智弗如變計思與敵機深

勇夫駭勢屈兒童獲舉世貴目前快意相促迫比讀莊
生書退守愚公術撲棗聽隣家搔爪任遘邑溪深獺起
魚果熟猿偷栗天地所長養於已何得失嗟理則誠然
自古戒鼠泣仙豈學淮南腐難嚇梁國舞應京房占磔
按張湯律終當就羅網不如放山澤永絕焚林風用全
飲河德

吳門遇劉雪舫

出門遇高會雜坐皆良朋排閤一少年其氣為幽并羌

裴雖裹膝目乃無諸傖忽然語笑合與我談生平亡姑
備宮掖吾父天家婚先皇在信邸降禮如諸甥長兄進
徹侯次兄拜將軍先皇早失恃寤寐求音形太廟奉睿
容流涕朝羣臣新樂初受封措笏登王庭至尊亦豐顧
一見驚公卿兩宮方貴重通籍長安門周侯累纖微鄙
哉無令名田氏起輕俠賓客多縱橫不比先后家天語
頻諄諄獨見新樂朝上意偏殷勤愛其子弟謹憂彼俸
給貧每開三十庫手賜千黃金長戈指北闕鼙鼓來西

秦寧武止一戰各帥皆投兵漁陽股肱郡千里無堅城
嗚呼四海主此際惟一身彷彿萬歲山先后輜輶迎辛
苦十七年欲訴知何因今纔識母面同去朝諸陵我兄
聞再拜慟哭高皇靈烈烈鞏都尉揮手先我行寧同英
國死不作襄城生我幼獨見遺貧賤今依人當時聽其
語剪燭忘深更長安昔全盛曾記朝元正道逢五侯騎
頗暫為卿兄即君貌酷似豐下而微黥貴戚諸舊游追
憶應難真依稀李與郭流落今誰存君曰欲我談清酒

須三升舊時白石莊萬柳餘空根海淀李侯墅秋雁飛
沙汀博平有別業乃在西湖濱惠安蓄名花牡丹天下
聞富貴一朝盡落日浮寒雲走馬南海子射兔西山陰
路傍一寢園御道居人侵碑鐫孝純字僵石莓苔青下
馬向之拜見者疑王孫詢是先后姪感歎增傷心落魄
游江湖踪跡嗟飄零傾囊縱蒲博劇飲甘沉淪不圖風
雨夜話舊同諸君已矣勿復言涕下沾衣襟

臨江叅軍

臨江髯叅軍負性何貞栗上書請賜對高語爭得失左
右為流汗天子知質直公卿有闕遺廣坐憂指摘鷹隼
伏指爪其氣嘗突兀同舍展歡謔失語輒面斥萬仞削
蒼崖飛鳥不得立予與交十年弱節資扶植忠孝固平
生吾徒在真寔去年羽書來中樞失籌策桓桓尚書公
提兵戰疾力將相有纖介中外為危慄君拜極言疏夜
半片紙出贊畫樞曹郎遷官得左秩天子欲用人何必
歷顯職所恨持祿流垂頭氣默塞主上憂山東無能恃

緩急投身感至性不敢量臣力受詞長安門走馬桑乾
側但見塵滅沒不知風慘慄四野多悲笳十日無消息
蒼頭草中來整暇見紙墨唯說尚書賢與語材挺特次
見諸大帥驕懦固無匹逗撓失事機倏忽不相及變計
趣之去直云戰不得成敗不可知死生予所執予時讀
其書對案不能食一朝敗問至南望為於邑忽得別地
書慰藉告親識云與副都護會師有月日顧恨不同死
痛憤填胸臆先是在軍中我師已孔亟剽略斬亂兵掩

面對之泣我法為三軍汝寔饑寒極諸營勢潰亡羣公
意敦逼公獨顧而笑我死則塞責老母隔山川無繇寄
悽惻作書與兒子勿復收吾骨得歸或相見且復慰家
室別我顧無言但云到順德掎角竟無人親軍惟數百
是夜所乘馬嘶鳴氣蕭瑟椎鼓鼓聲哀拔刀刀芒澀公
知為我故悲歌壯心溢當為諸將軍揮戈誓深入日暮
箭鏃盡左右刀鋌集帳下勸之走叱謂吾死國官能制
萬里年不及四十詔下詰死狀疏成紙為溼引義太激

昂見者憂讒疾公既先我亡投跡復奚恤大節苟弗明
後世謂吾筆此意通鬼神至尊從薄謫生還就畊志
願自此畢匡廬何巖業大江流不測君看磊落士艱難
到蓬華猶見叅軍船再訪征東宅風雨懷友生江山為
社稷生死無媿辭大義照顏色

贈願雲師

并序

願雲二十而與予游甲申間變常相約入山予
牽帥不果而師已悟道受法於雲門具和尚今

夏從靈隱來止城西之太平菴云將遠游廬嶽
貽書別予以兩人年踰不惑衰老漸至世法夢
幻惟出世大事乃為真寔學道一着不可不勉
予感其言因作此詩贈之并識予媿也

曉雨西山來松風滿溪閣忽得吾師書別予訪廬嶽分
攜出苦語殷勤謂同學兄弟四十餘衰遲已非昨寄身
蒼崖巔危苦愁失脚萬化皆虛空大事惟一着再拜誦
其言心頗抑何作未運初迤邐達人先大覺勸吾非不

早執手生退却流連白社期慚負青山約君親既有媿
身世將安托今觀吾師行四海一芒屨大道本面前即
是真極樂他年趺深巖白雲養寂寞一偈出千山下界
鐘磬作故人叩松關匡床坐酬酢不負吾師言十年踐
前諾

避亂

我生江湖邊行役四方早所歷皆關河故園跡偏少歸
去已亂離始憂天地小從人訪幽棲居然逢浩渺百頃

磬清湖烟清入飛鳥沙石晴可數
鳬鷺亂青草主人柴
門開雞聲綠楊曉花路若夢中
漁歌出杳杳白雲護仙
源劫灰應不擾定計浮扁舟於
焉得終老

其二

長日頻云亂臨時信孰傳
愁看小兒女倉卒恐紛然
緩急知難定身輕始易全
預將襁褓寄忍使道塗捐
天意添漂泊孤舟雨不前
途長從妾怨風急喜兒眠
水市灣頭見溪門屋後偏
終當渟樸處不作畏途看
未得更名

姓先教禮數寬因人拜村叟自去榜漁船多累心常苦
遭時轉自憐干戈猶未作已自出門難

其三

驟得江頭信龍關已不守由來嗤早計此日盡狂走老
穉爭渡頭篙師露兩肘屢喚不肯開得錢且沽酒予也
倉皇歸一時攜百口兩槳速若飛扁舟戢來久路近忽
又遲依稀認楊柳居人望帆立入門但需帚依然具盤
餐相依賴親友却話來途中所見俱八九失散追尋間

啼呼挽兩手屢休又急步獨行是衰朽村女亦何心挿
花尚盈首

其四

此方容跡便止為過來稀一自人爭避溪山客易知有
心高酒價無計掩漁扉已見東郭叟全家又別移總無
高枕地祇道故園非為客貪蝦菜逢人厭鼓輦兵戈千
里近隱避十年遲惟羨無家雁滄江他自飛

其五

月出前村白溪光照澄練放檝浮中流臨風浩歌斷天
塹非不雄哀哉日荒燕嗟爾謀國徒坐失江山半長年
篤起舞扁舟疾如箭可惜兩河士技擊無人戰孤蓬鐵
笛聲聞之淚流霰我生亦何為遭時涉憂患昔也游九
州今來五湖畔麻鞋習奔走淪落成愚賤

其六

曉起譁兵至戈船泊市橋草草十數人登岸沽村醪結
束雖非常零落無弓刀使氣搗市翁怒色殊無聊不知

何將軍到此貪逍遙官軍昔催租下令嚴秋毫盡道征夫苦不惜畊人勞江東今喪敗千里空蕭條此地村人居不足容旌旄君見大敵勇莫但驚吾曹

西田詩

穿築倦人事田野得自然偶來北郭外學住西溪邊道大習隱難地僻起衆傳而我忽相訪棹入荻蒲天落日浮遠樹桑柘生微烟逕轉蹊路迷鳬鴨引我船香近聞芰荷卧入花鮮妍人語出垂柳曲岸漁槎偏執手顧而

笑此乃吾西田長得君輩客野興同流連藉草傾一壺
聊以娛餘年

其二

到此身世寬
息心事樵牧舍南一團焦
云以飯黃犢入
門沿長廊虛堂敞心目把卷倚新桐
持杯泛南菊曲處
通簾櫳茶香具含蓄俄穿密室暗
條遇清溪綠碧水開
紅蕖娟娟幽獨有鳥立層波垂翅清如玉
對此不能
去溪光好留宿月照寒潭深經聲入寒竹
徙倚良有悟

閒房道書讀

其三

別業多幽處探源更不窮堤沿密篠盡路細竹扉通石
罅枯泉過菖蒲間碧叢一亭壓溪頭魚藻如游空扁舟
更不繫出沒柳陰風小閣收平蕪良苗何雍容此綠詎
可畫變化陰晴中隔岡見村舍曲背驅牛翁苦言官長峻
未敢休微躬樸陋矜詩書無乃與我同日落掩扉去滿
地桃花紅

其四

常言愛茅齋投老纔剪葺創置依舊圖新意出彷彿蒼
然一笠寒能添夕陽色細影懸晨光一一清露滴卞生
工丹青妙手固誰匹山村貧無人取意先自適想像生
雲烟為我開素壁了了見千峰可以攜手入道人十年
夢惆悵平生屐此地足卧游不負幽人室願以求長生
芝草堪采食

哭志衍

予始年十四與君蚤同學君獨許我文謂侔古人作長
揖謝時輩自比管與樂彊記矜絕倫讀書取大略家世
攻春秋訓詁苦穿鑿君撮諸家長弗受專門縛即子之
太公亦未相然諾高譚羣兒驚健筆小儒忤長途馭二
龍崇霄翔一鶚遂使天下士咸奉吾徒約詞塲擅兩吳
相與為掎角煌煌張夫子斯文紹濂洛五經叩鐘鏞百
家垂矩矱海內走其門鞍馬填城郭雲間數陳夏餘子
多磊落反騷擬三湘作賦誇五柞君也游其間才大資

磨斲詩篇口自哦書記手頻削冠蓋傾東南虛懷事酬
酢射策長安城驄馬黃金絡年少交公卿才智森噴薄
會值里中兒飛文肆謠詠要路示指蹤黨人罹矰繳君
也念急難踈通暗籌度陰落其機牙用意于莫覺逡巡
白衣奏停止黃門獄叶解褐未赴官歸來卧林壑賓客
益輻輳聲華日昭灼生徒丐譚論文史供揚摧貧賤諸
故人慰存餽衣藥躡履修起居小心見誠恪重氣狗長
者往往捐囊索居家夙貴盛朱門飾華榻壘石開樞軒

張燈透簾幕唱曲李延年俳弄黃幡綽舞席間毬場池
館花漠漠兄弟四五人會讌騰觚爵鹽豉下魚羹椒蘭
糝鳧臠每具十人饌中厨炊香穉客從遠方來咄嗟辦
脾臄昨宵已中酒命飲仍大釂叶而我過其家性不勝
杯杓小戶不足糾引滿狂笑嚔卷波喝遣輸射覆猜須
着狎侮座上人鬪捷貪諧謔警速誰能酬自喜看跳躍
堅坐聽其言乃獨無差錯親疎與長幼語語存斟酌性
厭禮法儒拘忌何齷齪風儀甚瓌偉衣冠偏落拓有時

不簪巾散髮忘盟濯中夜鬪歌呼分曹縱蒲博百萬一
擲輸放意長自若絕叫忽成虛衆手忽歛却男兒須作
健清談兼馬稍犯雪披輕衫笑予爾何弱嘗登黃山顛
飛步臨峭嶠下有萬仞潭徒侶愁失脚搔首凌雲烟翹
足傲衡霍顧予石城頭橫覽浮大白叶慷慨天下事風
塵慘河朔諸將擁重兵養寇飽鹵掠背後若有節此輩
急斬斮自請五千騎一舉殲首惡餘黨皆吾人散使歸
畊穫即今朝政亂舉錯混淆濁君父切邊疆羣臣私帷

幄當官不彈治何以司封駁對仗劾三公正色吐蹇諤
此志竟述邅天道何窮剝六載養邱園一官落印笮大
盜竊江黃克徒塞荆鄂間道攜妻孥改途走蠻貉瘴黑
箐林行颶作瀘溪泊驛路出枕榔候吏疑猿獍歇鞍到
平地修逢錦城樂問士先嚴楊恤民及程卓白鹽古戍
烽赤脚嚴關析再拜蜀王書流涕傾葵藿請府發千金
三軍賜酺醪賓旅給犀渠叟兵配駟騾此地俯中原巨
靈司鎖鑰水櫃扼涪江石門防劍閣我謀適不用岷峨

氣蕭索黑山起張燕青城突莊蹻積甲峨眉平飲馬瞿
塘涸生民為殖鷲醜類恣啖嚼徒行值虎豹同事皆燕
雀孤城遂摧陷狂刀乃屠膊有子踰十齡艱難孰顧托
閭門竟同殉覆卵無完殼一弟漏月歸兩踝見芒屨三
峽奔荆門魚龍食魂魄叶夢斷落滄江母乃遭搏攫耶
筒千日酒泉路無寂寞追計平生歡一一猶如昨壁間
所懸琴臨行彈別鶴玉子文楸枰尚記爭殘着百架藏
圖書千金入拳握刻意工丹青雲山共綿邈篋中白團

扇玉墜魚漉阿兄風流盡萬事俱零落我欲收君骨
茫茫隔山嶽後來識死事良史曾誰確此詩傳已中磨
崖書卓犖石剝蒼藤纏姓氏猶捫摸庶幾千載後悲風
入寥廓

閬州行

贈楊學博兩緒

四坐且勿喧聽吾歌閬州閬州天下勝十二錦屏樓歌
舞已渝盛江山士女游我有同年翁閬中舊鄉縣送客
蒼溪船讀書玉臺觀忽乘相如車謂受文翁薦游宦非

不歸十載成都亂只君為愛子相思不相見相見隔長
安干戈徒步難金牛盤七坂鐵馬斷千山敢辭道路艱
早向妻兒訣一身上鳥道全家傍虎穴君自為尊章豈
得顧妻子分攜各努力妾當為君死淒淒復切切苦語
不能答好寄武昌書莫買秦淮妾已水急若箭已船去
如葉兩岸蒼崖高孤帆望中沒二月到漢口三月下揚
州揚州花月地烽火似邊頭驛路逢老親遷官向閩越
謂逼公車期早看長安月再拜不忍去趣使嚴裝發河

山一朝異復作它鄉別別後竟何如飄零少定居愁中
鄉信斷不敢望來書盡道是葭萌殺人滿川陸積屍峨
嵋平千村惟鬼哭客有自秦關傳言且悲喜來時聞君
婦貞心視江水江水流不極猿聲哀豈聞將書封斷指
血淚染羅裙五內為崩摧買舟急迎取相逢惟一慟不
料吾見汝拭眼問舅姑雲山復何處淚盡日南天死生
不相遇汝有親弟兄提攜思共濟姊妹四五人扶持結
衣袂懷裏孤雛癡啼呼不知避失散倉皇間骨月都拋

棄悠悠彼蒼天於人抑何酷城中十萬戶白骨滿崖谷
官軍收成都千里見榛莽設官尹猿猴半以飼豺虎尚
道是閬州此地差安堵民少官則多莫恤蜀人苦淒涼
漢祖廟寂寞滕王臺子規叫夜月城郭生蒿萊只有嘉
陵江江聲自浩浩我欲竟此曲流涕不復道

讀端清鄭世子傳

昭代無遺憾萬事光史冊惜哉金川門神聖有慚德天
誘其子孫救之以讓國賢如鄭世子宗盟堪表率當壁

辭真王累疏誠懇惻天子詔勿許流涕守所執敝屣視
千乘謝之以長揖灑掃覃懷宮躬迓新王入夷齊既死
後曠代仍間出築屋蘇門山深心事經術明興二百年
廟樂猶得失以之輯羣書十載成卷帙候氣推黃鐘攷
風定六律解谷當南山伐竹製琴瑟為圖獻太常作之
文世室遂使溱洧間一洗萬古習我行漳河南懷古思
遺澤好學漢東平高風吳泰伯道傍立豐碑讓爵存月
日彼為一卷書能輕萬家邑大雅欽遺風誠哉不可及

梅村集卷一

欽定四庫全書

梅村集卷二

國子監祭酒吳偉業撰

五言古詩二

讀史雜詩

東漢昔云李黃門擅權勢積忿召外兵癰決身亦斃雖
自撥本根庶幾蕩殘穢誰云承敝起仍出刑餘裔孟德
沾丐養門資列朝貴憑藉盜弄兵豈曰唯才智追王故

長秋無鬚而配帝鈞黨諸名賢子孫為皂隸

其二

商君刑師傅徙木見威約范叔誣涇陽折脇吐蹇諤地
疎主恩深法輕主權削苟非用刻深何以膺付託功成
或倖退禍至終難度屈伸變化間即事多斟酌談笑遷
種人吾思王景略

其三

蕭何虛上坐故侯城門東曹參避正堂屈已事蓋公咄

咄兩布衣不仕隆準翁其術總黃老閱世浮沉中所以
輔兩人俱以功名終出處雖有異道義將毋同何必致
兩生彼哉叔孫通

其四

竇融昔布衣任俠家扶風翟公初舉事海內知其忠融
也受漢恩大義宜相從低頭就新莽顧入其軍中轉戰
槐里下盡力為摧鋒後來擁衆降仍以當時功忝竊居
河西蜀漢方相攻一朝決大計佐命蕭曹同吁嗟翟太

守為漢傾其宗劉氏已再興白骨無人封徒令千載後
流涕平陵東

又詠古

浹旬至台司三日遍華省慈明與中郎豈不念朝菌王
良御奔車勢逼崦嵫景急策度太行馬足殆而騁富貴
若歲時過則生災疹草木冬先榮經春輒凋殞桓桓梁
將軍赫赫蕭京尹一朝遇蹉跌未得全要領人生百年
內飽食與美寢毋以藜藿糲羨彼鐘與鼎毋以毛褐敝

羨彼紉與錦進固非伊周退亦無箕穎薄祿從下僚未
俗居中品寂寥子雲戟從容步兵飲

其二

西州杜伯山北海鄭康成李孟將舉事本初方用兵脫
身有追騎興疾猶從征何屑絕婚宦遯跡東籬門受逼
崔慧景語默難為情網疎免刑戮大道全身名時命苟
不佑千載無完人入山山易淺飲水水不清一身累妻
子動足皆荆榛自非焦孝先何以逃風塵庶幾詹尹卜

足保幽人貞

其三

古來有烈士軹里與易水慶卿雖不成其事已並美專
諸弑王僚朱亥殺晉鄙惜哉博浪椎何如圯橋屨公孫
擅西蜀可謂得士死連刺兩大將探囊取物耳皆從百
萬軍夜半入帳裏七首中要害絕跡復千里若論劍術
精前人莫能比胡使名弗傳無以著青史誰修俠客傳
闕疑存二子

其四

高密未佐命早共京師游弱冠拜司徒杖策功名收靈
臺畫少年萬古誰能儔興王諸將相足使風雲羞鄧芝
遇先主七十才封侯位至大將軍矍鑠高春秋英雄初
未遇垂老猶窮愁祖孫漢功臣年齒胡不侔我讀新野
傳慷慨思炎劉

其五

遭時固不易推心尤獨難景略王佐才臣主真交歡天

意不佑秦中道奪之年苻堅有大度豁達知名賢獨斷
未為失興毀寧非天賊苻寔弑君聞者為衝冠鎮惡丞
相孫流落來江南西伐功冠軍力戰收長安手劍縛姚
泓俘之出潼關張良為劉氏雅志在報韓能以家國恥
誣申兩主間其地皆西秦功亦堪比肩區區一李方報
恩何足言

其六

宜城酒家保北海賣餅師千金懸賞購萬里刵章追途

窮變名姓勢急投親知漢法重亡命保舍加誅厝破家
相存濟百口同安危虞卿捐相印恨未脫魏齊惜哉燕
太子流涕樊於期瀨水一女子魯國一小兒今也無其
人已矣其安歸廣柳可以置置當猛虎蹊復壁可以藏
藏憂黠鼠窺古道不可作太息將何為

遇南廂園叟感賦

寒潮衝廢壘火雲燒赤岡四月到金陵十日行大航平
生游宦地蹤跡都遺忘道遇一園叟問我來何方猶然

認舊役即事堪心傷開門延我坐破壁低圍牆却指灌
莽中此即為南廂衙舍成丘墟佃種輸租糧謀生改衣
食感舊存園莊艱難守茲土不敢之他鄉我因訪故基
步步添思量面水背蒼崖中為所居堂四海羅生徒六
館登文章松檜皆十圍鐘梵聲鏘鏘百頃搖澄潭夾岸
栽垂楊池上臨華軒菡萏吹芬芳譚笑盡貴游花月傾
壺觴其南有一亭梧竹生微涼回頭望雞籠廟貌諸侯
王左李右鄧沐中坐徐與常霜髯見鋒骨老將東甌湯

配食十六侯劍珮森成行得之為將相寧復憂封疆北
風江上急萬馬朝騰驤重來訪遺跡落日唯牛羊吁嗟
中山孫志氣胡勿昂生世苟如此不如死道傷惜哉裸
體辱仍在功臣坊蕭條同泰寺南枕山之陽當時寶
誌公妙塔天花香改葬施金棺手詔追褒揚袈裟
寄靈谷製度由蕭梁千尺觀象臺太史書禎祥北
望占旄頭夜夜愁光銍高帝遺衣冠月出修蒸嘗圖
書盈玉几弓劍堆金牀承乏忝兼官再拜陳衣裳

南內因灑掃銅龍啟未央幽花生御榻苔溫青蒼
琅離宮須望幸執戟衛中郎萬事今盡非東逝如
長江鍾陵十萬松大者參天長根節猶青銅屈曲
蒼皮僵不知何代物同日遭斧創前此千百年豈
獨無興亡況自百姓伐孰者非畊桑羣生與草木
長養皆吾皇人理已漸滅講舍宜其荒縹緲紛卷
軸零落誰收藏老翁見話久婦子私相商人倦馬亦疲
剪韭炊黃梁慎莫笑貧家一一羅酒漿從頭訴兵火眼

見尤悲愴^叶大軍從北來百姓聞驚惶下令將入城傳

箭需民房里正持府帖僉在御賜廊揷旗大道邊驅遣
誰能當但求骨肉完其敢攜筐箱扶持雖幼稚失散呼
耶孃江南昔未亂閭左稱阜康馬阮作相公行事偏猖
狂高鎮爭揚州左兵來武昌積漸成亂離記憶應難詳
下路初定來官吏踰貪狼按籍縛富人坐索千金裝以
此為才智豈曰惟私囊今日解馬草明日脩官塘誅求
却到骨皮肉俱生瘡野老讀詔書新政求循良爪哇亦

有畔溝水亦有防始信立國家不可無紀綱春來雨水
足四野欣農忙父子力畊耘得粟輸官倉遭遇重太平
窮老其何妨薄暮難再留暝色猶青蒼策馬自此去悽
惻摧中腸顧羨此老翁負耒歌滄浪牢落悲風塵天地
徒茫茫

下相懷古

驅車馬陵山落日見下相憶昔楚項王拔山氣何壯太
息取祖龍大言竟非妄破釜救邯鄲功居入關上殺降

復父讐不比諸侯將杯酒釋沛公殊有君人量胡為去
咸陽遭人扼其吭亞父無諍言竒計非所望重瞳顧柔
仁隆準至暴抗脫之掌握中骨肉俱無恙所以哭魯兄
仍具威儀葬古來名與色英雄不能忘力戰兼悲歌西
風起酸愴廢廟枕荒岡虞兮侍帷帳烏騅伏坐傍蹈地
哀鳴狀我來訪遺蹟登高見芒碭長陵竟抔土萬事同
惆悵

夜宿阜昌

我來古昌國望古思樂生總將六諸侯撫劍東粵征下
齊功不細奔趙事無成草沒黃金臺猶憶昭王迎涕泣
辭伐燕氣誼良非輕此真天下事豈獨因知兵忠心激
舊將誓死存聊城惜哉魯仲連排難徒高名勸使東游
齊毋乃傷縱橫

贈家侍御雪航

士生捨擯中非氣莫能濟勁節行胸懷高談豁心智吾
家侍御公平生蘊風義世難初橫流事定猶草昧召見

邯鄲宮軍中獲能吏移牒拜諫官創業更新制長刀夾
殿門令下誰敢議扣馬忽上陳挺身艱難際丈夫持國
是僵仆無所避封事即留中天語加褒異受命巡山東
恩威恤凋弊會討泰山賊無辜輒連治破械使之歸父
老皆流涕征南甘侯軍豪奪武昌地可憐黃陵廟鈔略
空村閉君來仗威名一言釋猜忌塢壁招殘民郊原戢
游騎從此已邱兵始識長沙尉西望浚稽山黃河遶其
背青羗十七種驂駟飾文蜀自古於金城互市有深意

蜀賈蒙山茶兵火苦莫致將吏使之然憂將玉關廢奉
詔清河湟俾復商人利千里摘岷峨五花散涇渭至今
青海頭共刻黃龍誓揭節還歸來公私積勞勩安卧無
多談循資躡高位却拜極言䟽手板指朝貴恩深因薄
謫材大終難棄古之賢豪人深沉在晚歲歛盡萬里心
日共殘編對學以閱世深官從讀書退以之輕軒冕蕭
條自標置我來客京師一身似匏繫老大慚知交淒涼
托兄弟臨風或長歌邀月非沉醉論世追黃虞刪詩及

曹魏恐君故鄉思失我窮途慰家在五湖西扁舟入夢
寐欲取石上泉洗濯塵中累羣公方見推雅志安得遂
朝罷看西山千峰落濃翠良友供盤桓清秋足游憩待
予同拂衣徐理歸田計

題河渚圖送胡彥遠南歸

馬背語江南春山吾負汝白雲能容人猿鳥不我與西
冷有高士結廬在河渚讀書尚感激平生慎推許獨坐
長微吟清言出機杼秋風忽乘興千里長安旅同好四

五人招尋忘出處寄跡依琳宮雙松得儔侶雖入侯王
門不受公卿舉登高見遺廟頽垣竈鼯鼠悲歌因卧病
歸心入春雨從此謝姓名問之了不語我為作此圖彷彿
梅花墅蒼然開南軒飛泉落孤嶼想見君山中相思
日延佇

送何省齋

哲人尚休官取志不在歲賢達恃少年輕心撥名勢神
仙與酒色皆足供蟬蛻在己本歡娛富貴應難累婆娑

彼顏老匪止妻孥計棲棲守腐鼠自信無餘技嗟我豈
其然今也跡相類同事有何郎英懷托深契三十拜侍
中向人發長喟拂袖歸去來故園有松桂世網敢自由
鄉心偶然遂樗散却見留送之以流涕我昔少壯時聲
華振儕輩講舍雞籠巔賓朋屢高會總角能清談君家
好兄弟緩帶天地寬健筆江山麗憑闌見湓口傳烽響
笳吹海寓方紛紜虛名束心意夜半話掛冠明日扁舟
繫問余當時年三十甫過二採藥尋名山筋力正強濟

濯足滄浪流白雲養身世長放萬里心
拔脚風塵際昔為雲中鵠翩翩九臯唳
今為轅下駒局促長楸轡梗枿蟠枯根
天陰蟲蟻萃縱抱凌霄姿蕭條斧斤畏
時命苟弗諧貧賤安可冀過盡九折艱
咫尺俄失墜淒涼游子裝訣絕衰親淚
關山車馬煩雨雪衣裘敝長安十二衢
畫戟朱扉衛冠蓋起雞鳴蹀躞名豪騎
通籍平生交於今悉凋替磬折當途前
問語不敢對衰白齒坐愁逡巡與之避
禁掖無立談獨行心且悒邂逅君登朝
讀書入

中秘父子被詔除一堂共昆季呼兒爭出拜索果牽衣
戲回首十六年踪跡猶堪記荏苒曾幾何萬事經興廢
停觴重剪燭相對加噓唏我行感衰疾腰脚增疲曳可
憐扶杖走尚逐名賢隊薄祿貧負閒憂責仍不細危從
游甘泉浙浙驚沙厲藉草貧無氈僕夫枕以塊霜風帽
帶斜頭寒縮如蝟入門問妻孥呻吟在牀被幼女掩面
啼燈青照殘穗白楊何蕭蕭衝泥送歸櫓死顧得還
我留復誰為旁有親識人通都走聲利厚意解羈愁戚

言推名位不悟聽者心怛若芒在背忽接山中書又責
以宜退卿言誠復佳我命有所制總未涉世深止知乞
身易悶即君過存高談豁蒙蔽苦樂來無方窮達總一
致同是集蓼蟲以此識其味人生厭束縛擺落須才氣
君初丞相家祖德簪纓繼吐納既風流姿容更瓌異披
史妙縱橫論詩富裁製激昂承明廷面折公卿議文士
寡先容疎道得交臂騶哄訪當關休沐杉齋閉良工鑄
干將出匣蛟龍忌趨駕度太行躊躇棄騏驎矯矯朗陵

公竟下考功第老夫迫枯朽抱膝端居睡雖稱茂陵病
終乏鴟夷智遜子十倍才焉能一官棄早貴生道心中
年負名義蹉跎甘皓首此則予所媿君今謝塵鞅輕裝
去如駛雙槳石頭城木落征驂憇過我儒林館寒鴉噪
平地函丈無復存依舊晴嵐翠明年春水滿客興烟波
趣鶯啼笠澤船花發龍沙醉高堂剖符竹盡室千山內
郡閣遶鳴灘日晡散人吏無書悼遷斥有夢傷迢遞巔
雁時獨飛楚天樹如薺雙眼渺荒江片帆忽而至家人

遠棹立愛子趨庭慰誰云謫宦愁老覺

君恩最共上鬱孤臺側身望燕魏惆悵念故人沉吟不
能置三載客他鄉一朝遽分袂勞生任潦倒失志同飄
寄少壯今逍遙老大偏濡滯舉世縱相識出門竟誰詣
太息行路難殷勤進規誨後會良可希尺書到猶未相
去各一方天涯隔憔悴開篋視此詩恍恍不能寐

送宛陵施愚山提學山東

秦皇昔東巡作歌示來裔李斯留篆刻足共神仙配胡

為秦岱巔蒼碑獨無字持此謝六經免滋後賢議至今
倉頡臺行人尚流涕君今懷古跡斯文起凋敝蟲魚雖
改竄扶桑自天際千載靈光宮丹書閉房記兵火獨搜
揚重見鍾離意

其二

魯儒好逢掖僂僂循墻恭長劍忽拄頤掉舌談天雄諸
侯走書幣擁篲梧丘宮孟嘗一公子珠履傾關東後米
北海相坐上猶遺風君愁吳越士名在甘陵中無使稷

下徒車馬矜雍容華士苟不幾橫議將安窮古道誠可
作千里尊龜蒙

其三

伊昔嘉隆時文章尚丹腹矯矯濟南生突過黃初作百
年少知己褒譏互參錯風習使之然詩書狗然諾淒涼
白雲署前賢遂寥廓君初領法曹追踪好棲托此行過
歷下高風緬如昨太白游山東後來訪廬霍獨愛宣州
城江山足吟詠讀君官舍詩鄉心戀巖壑目斷敬亭雲

口銜竹溪酌借問謫仙人何如謝康樂

鑾清湖

并序

鑾清湖者西連陳湖南接陳墓其先褚氏之所
居也鑾清者土人以水清疑其下有鑾石故名
或曰范蠡去越取道於此湖名范遷以音近而
訛世遠莫得而攷也太湖居吾郡之西有大山
衝擊風濤湍悍而陳湖諸水渟泓演迤居人狎
而安焉烟村水市若鳬雁之着波面千百於其

中土沃以厚畝收二鍾有魚蝦菱芡之利資船
以出入科徭視他境差緩故其民日以饒不為
盜吾宗之繇倩青房公益兄弟居於此四世矣
余以乙酉五月避難倉皇攜百口投之中流風
雨大作扁舟掀簸榜人不辨水門故處久之始
達主人開門延宿雞黍酒漿將迎灑掃其居前
榮後寢葭蘆掩映榆柳蕭疎月出柴門漁歌四
起杳然不知有人世事矣是時姑蘓送款兵至

不戮一人消息流傳緩急互異湖中烟火晏然
予將卜築買田耦耕終老居兩月而陳墓之變
作於是流離轉徙懂而後免事定將踐前約尋
以世故牽挽流涕登車疾病顛連關河阻隔比
三載得歸而青房過訪草堂見予髮白齒落深
怪早衰又以其窮愁筑獨妻妾相繼下世因話
昔年湖山兵火奔走提攜心力枉枯骨肉安在
太息者久之青房亦以毀家紓役舊業蕩然水

鳥樹林依稀如故而居停數椽斷甃零甃罔有
存者人世盛衰聚散之故豈可問耶撫今追往
詮次為五言長詩用識吾慨且以明舊德於不
忘也

吾宗老孫子住在琴清湖湖水清且漣其地皆膏腴堤
栽百株柳池種千石魚教僮數鵝鴨遶屋開芙蓉有書
足以讀有酒易以沽終老寡送迎頭髮可不梳相傳范
少伯三徙由中吳一舸從此去在理或不誣嗟予遇兵

火百口如飛鳧避地何所投扁舟指菰蒲北風晚正急
烟港生模糊船小吹雨來衣薄無朝舖前村似將近路
轉忽又無倉皇值漁火欲問心已孤俄見葭莢邊主人
出門呼開柵引我船掃室容我徒我家兩衰親上奉高
堂姑艱難總頭白動止需人扶妻妾病伶仃嘔吐當中
途長女僅九齡餘泣猶呱呱入君所居室燈火映牕疏
寬間分數寢嬉笑喧諸雛縛帚東西廂行李安從奴前
牕張罽網後壁掛耒鋤苦辭村地僻客舍無精廬前韭

烹伏雌斫鱸炊彫胡床頭出濁醪人倦消幾壺睡起日
已高曉色開烟蕪漁灣一兩家點染江村圖沙嘴何人
舟消息傳姑蘇或云江州下不比揚州屠早晚安集椽
鞍馬來南都或云移民房挿箭下嚴符囊索歸他人婦
女充軍俘里老獨晏然催辦今年租餼畊看賽社醵飲
聽呼盧軍馬總不來里巷相為娛而我游其間坦腹行
徐徐見人盡恭敬不識誰賢愚魚蝦盈小市鳬雁充中
厨月出浮溪光萬象疑沾濡放楫凌滄浪笑弄驪龍珠

夷猶發浩唱禮法胡能拘東南雖板蕩此地其黃虞世
事有反覆變亂興須臾草草十數人盟歆起里閭兇園
一老生自詭讀穰苴漁翁爭坐席有力為專諸舴艋飾
餘皇蓑笠裝犀渠大笑擲釣竿赤手搏於菟欲奪夫差
宮坐擁專城居予又出子門十步九崎嶇脫身白刃間
性命輕錨鉅我去子亦行後各還其廬官軍雖屢到尚
未成邱墟生涯免溝壑身計謀樵漁買得百畝田從子
學長沮天意不我從世網將人驅親朋盡追送涕泣登

征車吾生罹干戈猶與骨肉俱一官受逼迫萬事堪歎
歎倦策既歸來入室翻次且念我平生人慘澹留羅襦
秋雨君叩門一見驚清癯我苦不必言但坐觀髭鬚歲
月曾幾何筋力遠不如遭亂若此衰豈得勝奔趨十年
顧妻子心力都成虛分離有定分久暫理不殊翻笑危
急時奔走徒區區君時聽我語顏色慘不舒亂世畏盛
名薄俗容小儒生來遠朝市謂足逃沮洳長官誅求急
姓氏屬里胥夜半聞叩門瓶盎少所儲豈不惜堂構其

奈愁征輸庭樹好追涼剪伐存枯株池荷久不開歲久
填泥淤廢宅鋤為田薺麥生階除當時棲息地零落今
無餘生還愛節物高會逢茱萸好採籬下菊且讀囊中
書中懷苟自得外物非吾須君觀鷓鴣夷子眷戀傾城姝
千金亦偶然奚足稱陶朱不如棄家去漁釣山之隅江
湖至廣大何惜安徽軀揮手謝時輩慎勿空躊躇

梅村集卷二

欽定四庫全書

梅村集卷三

國子監祭酒吳偉業撰

五言古詩三

清涼山讚佛詩

西北有高山云是文殊臺臺上明月池千葉金蓮開花
花相映發葉葉同根栽王母攜雙成綠蓋雲中來漢王
坐法宮一見光徘徊結以同心合授以九子釵翠裝雕

玉輦丹旒沉香齋護置琉璃屏立在文石階長恐乘風
去舍我歸蓬萊從獵往上林小隊城南隈雪鷹異凡羽
果馬殊羣材言過樂游苑進及長楊街張宴奏絲桐新
月穿宮槐攜手忽太息樂極生微哀千秋終寂寞此日
誰追陪陛下壽萬年妾命如塵埃願共南山柳長奉西
宮杯披香淖博士側聞私驚猜今日樂方樂斯語胡為
哉待詔東方生執戟前詼諧薰鑪拂黼帳白露零蒼苔
吾王慎玉體對酒毋傷懷

其二

傷懷驚涼風深宮鳴蟋蟀嚴霜被瓊樹芙蓉凋素質可
憐千里草萎落無顏色孔雀蒲桃錦親自紅女織殊方
初云獻知破萬家室瑟瑟大秦珠珊瑚高八尺割之施
精藍千佛莊嚴飾持來付一炬泉路誰能識紅顏尚焦
土百萬無容惜小臣助長號賜衣或一襲只愁許史輩
急淚難時得從官進哀誄黃紙抄名入流涕盧郎才容
嗟謝生筆尚方列珍膳天厨供玉粒官家未解菜對案

不能食黑衣召誌公白馬馱羅什焚香內道場廣座楞
伽譚資彼象教恩輕我人王力微聞金雞詔亦由玉妃
出高原營寢廟近野開陵邑南望蒼舒墳掩面添悽惻
戒言秣我馬遨遊凌八極

其三

八極何茫茫曰往清涼山此山蓄靈異浩氣供屈盤能
蓄太古雪一洗天地顏日馭有不到縹緲風雲寒世尊
昔示現說法同阿難講樹聳千尺搖落青琅玕諸天過

峰頭絳節乘銀鸞一笑偶下謫脫却芙蓉冠游戲登瓊樓窈窕垂雲鬋三世俄去來任作優曇看名山初望幸銜命釋道安預從最高頂灑掃七佛壇靈境乃香絕捫葛勞躋攀路盡逢一峰傑閣圍朱闌中坐一天人吐氣如栴檀寄語漢皇帝何苦留人間煙嵐倏滅沒流水空潺湲回首長安城縑素慘不歡房星竟未動天降白玉棺惜哉善財洞未得誇迎鑒惟有大道心與石永不刊以此護金輪法海無波瀾

其四

嘗聞穆天子六飛騁萬里仙人觴瑤池白雲出杯底遠
駕求長生逐日過濛汜盛姬病不救揮鞭哭弱水漢皇
好神仙妻子思脫屣東巡并西幸離宮宿羅綺寵辱長
門陳恩威傾城李穠華即修夜痛入哀蟬誅苦無不死
方得令昭陽起晚抱甘泉病遽下輪臺悔蕭蕭茂陵樹
殘碑泣風雨天地有此山蒼崖閔興毀我佛施津梁層
臺簇蓮葉龍象居虛空下界聞鬬蟻乘時方救物生民

難其已澹泊心無為怡神在玉几長以兢業心了彼清
淨理羊車稀復幸牛山竊所鄙縱灑蒼梧淚莫賣西陵
履持此禮覺王賢聖總一軌道參無生妙功謝有為恥
色空兩不住收拾宗風裏

石公山

真宰斲雲根奇物思所置養之以天池盆盎挿靈異初
為仙家囿百仞千倉閉釜鬲炊雲中杵白鳴天際忽而
遇巖城猿獠不能絕遠窺樓櫓堅逼視戈矛利一闕當

其中飛鳥為之避仰睇微有光投足疑無地循級登層
巔天風豁蒼翠疲喘千屏牛落落誰能制僂僂一老人
獨立拊其背既若拱而揖又疑隱而睡此乃為石公三
問不吾對

歸雲洞

歸雲何孱顏雕斲自太古千松互盤結托根無一土呀
然丹崖開蒼茫百靈斧萬載長歎危撐拄良亦苦古佛
自為相一身雜仰俯依稀莓苔中葉葉青蓮吐若以皮

真詮足號藏書府仙翁刺船來坐擘麒麟脯鐵笛起中
流進酒虬龍舞晚向洞中眠叱石開百武牀几與棋局
一一陳廊廡翩然自茲去黃鵠瀟湘浦恐使吾徒窺還
將白雲補

縹緲峰

茲峰非云高高與衆山別其下多嵌空天風吹不折挿
根虛無際縹緲為險絕細徑緣山腰人聲來未末籃輿
雜徒步佳處欣屢歇躋嶺路倍艱往往攬垂葛灝氣凌

沈寥一身苦冰雪輕心出天地羽翮生髣髴杖底撥殘
雲了了見吳越曜靈燭滄浪滉漭金光發陰霞俄已變
慘澹玄雲結歸筇破暝靄半嶺值虹蜺始知清境杳跡
共人鳥滅丹砂定可求苦為妻子奪看君衣上雲飛過
松間月

林屋洞

震澤初未定水石爭相攻神龍排杳冥盪擊沈虛宮仙
人資禹力洞府開洪濛惜哉石函書不救夫差窮大道

既已洩國祚於焉終我行訪遺蹟興極探虛空絕徑不
可肥自視猶枯筇山神愛偃僂直立憂微躬以之生退
怯匍匐羞兒童傳聞過險澀谿呀來天風松炬厭明滅
乳竇驚青紅洪崖應常來牀几陳從容何不迴真馭日
月行其中銀房閟幽異勿使吾徒同終常齋餼糧鍊骨
如飛鴻路穿三江底境與諸天通南浮瀟湘水西上我
眉峰歸來詫里人足比靈威翁

送周子儼

五載寄幽燕歸來問家室入門四壁在小婦當牕織恐
其話饑寒且呼治酒食妻子識君心低頭惟默默嗟余
忝隣里欲語弗遑及聞君又行邁君歸曾幾日嗟此父
母邦過若遠鄉客丈夫志四海行矣須努力

其二

努力贏餽糧秋風即長路京口正用兵倉皇過瓜步扁
舟戒行李六月黃河怒脫身萬仞淵此險何足數慷慨
輕波濤長年豈知故中道感舊交良為詩書悞餘生嬰

世網重來獻詞賦登高望烽火躊躇屢迴顧

其三

迴顧去鄉遠進及長安城禁門十二戟策馬聞雞鳴解
褐初登朝日出趨承明慶雲生堦墀天樂和且平立談
計誠用萬里無專征忘形樂簡易任氣高縱橫常恐斗
酒後脫略驚公卿一官了婚嫁可以謀歸耕

其四

歸耕東岡陂清流貫羣木月明夜方靜高話溪堂宿破

產求神仙丹砂狗微祿玉書晚應悟至道亡情欲一飯
輒萬錢并日恒不足知交雖云厚詎可先骨肉閱世經
艱難息心謝榮辱平生著述事尚有殘編讀

蕩子失意行贈李雲田

君家楚山下門前溪流願識賢與豪不羨公與侯動
足有萬里妻子何能留丈夫重意氣恥為兒女柔中夜
理瑤瑟思婦當高樓鶯花二三月送君下揚州小孤白
浪惡腸斷征帆收長干嬌麗地一顧嘶驂騶茁茁亦已

落蘭杜方經秋十月嚴風寒剪燭紉衣裘太行車輪摧
落葉填霜溝君又自茲去匹馬將誰投趙女顏如花窈
窕迴明眸皎皎雙行纏巧笑塞羅幃男兒重紅粉妾夢
輕浮漚今年附書至慰訊猶綢繆客囊無長物旅病才
新瘳途窮狗知已進止詎自由狂走三十年布褐空蒙
頭不如歸去來漁釣滄浪謳大兒誦文史小婦彈箜篌
南村沽社酒西舍牽畊牛人生一蘧廬漂泊如飛鷗得
意匪為樂失路寧關愁居為段干隱出作盧敖游我欲

竟此曲君笑登扁舟碧天浩無際極目徒悠悠

丁未三月廿四日從山後過湖宿福源精舍

千林已暝色一峰猶夕陽拾級身漸高樵徑何微茫回
看斷山口樹杪浮湖光松子向前落道人開石房橘租
養心性取足鬚眉蒼清磬時一聲流水穿深篁我生亦
何幸暫憩支公床客夢入翠微人事良可忘

廿五日偕穆苑先孫浣心葉予聞允文游石公山

盤龍石梁寂光歸雲諸勝

大道無端倪真宰有融結茲山在天壤靈異蓄不泄萬
竅凌虛無一柱支毫末疑豈愚公移愁為巨靈拔劉根
作堂與柳毅司扁鐫誰啓仙人閤繫我漁父杻刻鏤洪
濛雲雕搜大荒雪或人而病瘿或馬而蹄齧或負藏壑
舟或截專車節或象神鼎鑄或類昆吾切地肺庖丁解
月窟工倕伐石因封餽糧天府甃涓潔重陳累甑甌短
柱增櫨稅瓜瓠觚稜剖木皮槎枿裂皚皚黃河水炎炎
崑岡熱哈呀舞辟邪談訕張饕餮斗起聳雲闕一道通

箭筈碧藕玲瓏根文螺宛委穴丹梯躡而上鬱鬱虛皇
闕突兀撐青旻插地屏障列一身生羽翰百尺跨虹蜺
斷澗吟風柵颯爽侵毛髮側窺漏日影了了澄潭澈雞
聲出烟井乃與人境接迴思頃所歷過眼纔一瞥秦皇
及漢武好大同蠓蟻齊諧不能志炙輠不能說酈桑二
小儒註書事抄撮陋襲李斯碑闕補周王碣闕全亦妙
手惜未適吳越萬華雖云高無以闢巧拙時俗趨姿媚
烟巒漫塗抹妄使僉父輩笑我驕蟻垤京江吸金焦漢

水注大別流峙合而滙奇氣乃一發睥睨五嶽問誰與
分優劣扶杖一村翁眼看話年月昔逢猶兒童今見已
耄耄昨聞縣帖下搜索到魚鱉訝彼白黿逃無乃青草
竭却留幽境在似為肥遯設當年綺里李卜居採薇蕨
皓首走漢廷恨未與世絕若隨靈威去此處攬藤葛子
房知難致欲薦且捫舌浮生每連蜷塵界儘空濶謀免
妻孥愁計取山水悅入春桃李過韶景聽啼鳩籃輿累
親舊同載有二葉穉生老而健孫郎才且傑彼忘筋力

勞我愛賓朋挈過湖曳輕帆入寺憩深樾老僧諧語笑
妙理攻麴蘖曉起陳盤餐飽食非麤糲桑畦路宛宛筍
屨行兀兀快意在此游失記遺七八平湖鋪若茵磐石
幾人歇蹲踞當其旁拒戶相支遏黝黑聲訇稜欲進遭
嗔喝側肩僅容趾腹背供磨軋下踰蘚磴牢上覩崩崖
豁攀躋差毫釐失足憂一蹶前竒慕先過後險欣乍脫
歌呼雜齟穽嘻笑視履襪君看長安道高步多蹉跌散
誕來江湖蒲伏羞干謁頭因石丈低腰向山靈折四月

將已近天時早炎熱揮汗何沾濡驚飈俄凜冽歸來北
窓枕響入山溜徹不寐話夜涼連床擁裘褐晚歲艱出
門端居意騷屑閒踪習羈旅逸興貪放達跌蕩馮夷宮
游戲天吳窟將毋神鬼怒亟遣風雨奪勝事滿現前得
失歸勇怯衰老偕故人幸喜茲游決它年子胥濤百里
聞咤咤鱸鮓隨風雷頸鎖金牛掣鮫人拭床几神女洗
環玦礪礪打空灘澎湃飛沫噌吰無射鐘嘹唳蕤賓
鐵孤客為旁皇嫠婦為悽咽那知捩柁下我輩行車轍

再拜告石公相逢慰饑渴既從人間世忍再洪波沒志
怪作大言嗜竒私神物肯學楊馬鑄願受壺公訣縮之
入懷袖弄之置盆鉢栽松龍氣上蓄水雲根活長留文
士玩勿被山君竊嘗聞岫嶠峰科斗尊往牒剝蝕存盤
螭捫索嗟完缺此山通巴陵下有神禹札後代文字衰
致起龍蛇孽我有琅玕管上灑湘娥血濯足臨滄浪浩
思吟不輟未堪追陽水猶足誇李渤隱從烟霞閑出供
時世閱刻之藏書巖千載應不滅

游石公歸是夜驟雨明晨微霽同諸君天王寺看

牡丹

烟嵐澹方霽沙暖得徐步訪寺苔徑微遠近人語誤道
半逢一泉曲折隨所赴觸石松頂飛其白或如鷺尋源
入杳冥壑絕橋屢渡中有二比丘種桃白雲護花將舞
而笑石則落猶怒澆之以杯酒娟然若迴顧此處疑仙
源快意兼緇素苦辭山地薄縣官責常賦蔬果雖已榮
龍象如欲訴學道與養生得失從時務吾徒筋力衰萬

事俱遲暮太息因歸來鐘聲發清悟

揖山樓

名山誰逢迎遇人若俯仰心目無端倪默然與之往幽
泉互相答飛鳥入空想傑閣生其間櫺軒爭一壘嘉樹
為我圓坐久惜餘賞暝靄忽而合明月出孤掌彈琴坐
其中萬籟避清響良夜此會難佳處莫能獎

鹽官僧香海問詩於梅村村梅大發以詩謝之

但訪梅花來今見梅花去何必為村翁重尋灌園處種

梅三十年遶屋已千樹饑摘花藥餐倦抱花影睡枯坐
無一言自謂得花意師今遠來游恰與春光遇索我囊
中詩搔首不能對寄語謝故人幽香養衰廢溪頭三尺
水好洗梅魂句

直溪吏

直溪雖鄉村故是尚書里短棹經其門呌聲忽盈耳一
翁被束縛苦辭索如洗吏指所居堂即貧誰信爾呼人
好作計緩且受鞭箠穿漏四五間中已無窓几屋梁紀

月日仰視殊自恥昔也三年成今也一朝毀貽我風雨
愁飽汝歌呼喜官逋依舊在府帖重追起旁人共歎歎
感嘆良有以東家瓦漸稀西舍墻半圯生涯分應盡遲
速總一理居者今何栖去者將安徙明歲留空村極目
唯流水

臨頃兒

臨頃誰家兒生小矜白皙阿爺負官錢棄置何倉卒紹
我適誰家朱門臨廣陌囑儂且好住跳弄無知識獨怪

臨去時摩首如憐惜三年教歌舞萬里離親戚絕伎逢
侯王寵異施恩澤高堂紅氍毹華燈布瑤席授以紫檀
槽吹以白玉笛文錦縫我衣珍珠裝我額瑟瑟珊瑚枝
曲罷恣狼藉我本貧家子邂逅遭拋擲一身被驅使兩
口無消息縱賞千黃金莫救餓死骨歡樂居它鄉骨肉
誠何益

梅村集卷三

欽定四庫全書

梅村集卷四

國子監祭酒吳偉業撰

七言古詩一

行路難

奉君乘鸞明月之美扇
耶谿赤堇之寶刀
莞菟桃笙之綺席
陽阿激楚之洞簫
丈夫得意早行樂
歌舞任俠稱人豪
舉杯一歌行路難
酒闌鐘歇風蕭蕭

其二

長安巧工製名燈七龍五鳳光層層中有青熒之朱火
下有映徹之澄水游魚揚鬐肆灑濤飛鳥奮翼思竄騰
黑風吹來徧槐市狂花振落燒觚稜金吾之威不能禁
鐵柱倒塌銅盤傾使人策馬不能去青燐鬼哭唯空城

其三

君不見無須將問咄呼天賜錢請葬驪山邊父為萬乘
子黔首不得耕種咸陽田君不見金墉城頭高百尺河

間成都弄刀戟草木萌芽殺長沙狂風烈烈吹枯骨人
生骨肉那可保富貴榮華幾時好龍子作事非尋常奪
衆爭梨天下擾金牀玉几不得眠一朝零落同秋艸

其四

愁思忽不樂乃上咸陽橋盤螭蹲獸勢相齧豁呀口鼻
吞崩濤當時平明出萬騎馬蹄蹠蹠何逍遙長安冠蓋
一朝改紫裘意氣非吾曹柴車辟易伏道畔舍人辭去
妻孥嘲人生太行起面前何必褒斜棧閣崎嶇高

其五

君不見南山松柏何蔥菁於世無害人無爭斧聲丁丁
滿崖谷不知其下何王陵玉箱夜出寶衣盡冬青葉落
吹魚燈石馬無聲缺左耳豐碑倒折纏枯藤當時公卿
再拜下車過今朝蔓草居人耕

其六

漢家身毒鏡大如八銖錢蒲桃錦囊雖黯澹盤龍婉轉
絲結連云是宣皇母后物摩挲愛惜宮中傳土花埋沒

今千年對此撫兒長嘆息金張許史皆徒然

其七

君不見黃河之水從天來一朝乃沒梁王臺梁王臺成
高崔嵬禁門平坦車如雷千尺金堤壞百里嚴城開君
臣將相竟安在化為白黿與黃能乃知水可亡人國昆
明劫灰何如哉

其八

男兒讀書良不惡屈首殘編務穿鑿窮年矻矻竟無成

徒使聲華受蕭索君不見王令文章今大進邱公官退
才亦盡寂寂齋居自著書太玄竒字無人問

其九

伏軾說人主談笑稱上客一見賜黃金再見賜白璧夜
半宮中獨召見母弟通侯皆避席上殿批逆鱗下殿犯
貴戚犀首進讒譖韓非受指摘夜走函谷關逡巡不能
出君不見范雎折脇懲前事身退功成歸蔡澤

其十

君不見鄭莊洗沐從知交傾身置驛長安郊又不見任
君談辭接後進冠蓋從游數百乘人生盛名致賓客失
勢人情諒非昔年少停車莫掃門故人行酒誰離席

其十一

直諫好言事召見拜司隸彈劾中黃門鯁切無所避天
子初見容謂是敢言吏以茲增感激居官厲鋒氣奏對
金商門縛下都船獄髡頭徙朔方衆怒猶不足私劍揣
其喉赤車再收族橫尸都亭前妻子不敢哭酒色作直

都殺人藏頭畏尾徒碌碌

其十二

拔劍橫左膝
嗔目悲歌向坐客
我初從軍縛袴褶
手擊黃顰弓霹靂
生來不識官家貴
帶甲持兵但長揖
驅馬來中原
尚書奏功級前庭
論爵賞後殿
賜飲食烏鵲家
兒坐我上壞坐爭
言多酒失御史彈
文讀且糾待罪驚
憂不敢出還君絳
衲兩當衫歸去射
獵終南山

其十三

平生俠游尚輕利劇孟為兄灌夫弟使酒罵坐人探丸
斫俗吏流血都市中追兵數十騎借問追者誰云是灞
陵杜穉季抽矢弗射是故人兩馬相逢互交臂吾徒豈
相厄便當從此逝秦山羊氏能藏跡北海孫公堪避世
復壁埋名二十年赦書却下咸陽尉歸來故鄉無負郭
破家結客成何濟

其十四

今我思出門圖作雒陽買東游陳鄭北齊魯白壁一雙

交王公明珠十斛買歌舞關中軺車方算緡高編我戎
下荆楚道阻淮南兵貨折河東佔朝為猗頓暮黠婁乞
食吹簫還故土

其十五

丈夫少年使絕域從行吏士交河卒布衣功拜甘泉侯
獨護高車四十國蒲萄美酒樽中醉汗血名駒帳前立
富貴歸故鄉上書乞骸骨漢使遮玉關不遣將軍入軍
中夜唱行路難條支海上秋風急

其十六

西莫過金牛關懸崖鐵鎖猿猱攀南莫過惡道灘盤渦
利石戈矛攢猩猩啼兮杜鵑叫落日青楓山鬼嘯篁竹
深巖不見天我所悲兮在遠道

其十七

結帶理流蘇流蘇紛亂不能理當時羅帷鑒明月皎皎
容華若桃李一自君出門深閨厭羅綺有人附書還君
到長千里名都鶯花發皓齒知君眷眷嬋娟子太行之

山黃河水君心不測竟如此寄君翡翠之鷄釵傳璣之
墮珥勸君歸來且歡喜卧疾空床為君起

其十八

吾將老焉惟糟邱裸身大笑輕王侯禮法之士憎如讐
此中未得逍遙游不如飲一斗顏然便就醉執法在前
無所畏君不見嵇生幽憤阮生哭箕踞狂呼不得意

永和宮詞

揚州明月杜陵花夾道香塵迎麗華舊宅江都飛燕井

新侯關內武安家雅步纖腰初召入鈿合金釵定情日
豐容盛鬋固無雙蹴鞠彈碁復第一上林花鳥寫生綃
禁本鍾王點素毫楊柳風微春試馬梧桐露冷暮吹簫
君王宵旰無歡思宮門夜半傳封事玉几金床少晏眠
陳娥衛艷誰頻侍貴妃明慧獨承恩宜笑宜愁慰至尊
皓齒不呈微索問蛾眉欲蹙又溫存本朝家法脩清讌
房帷久絕珍奇薦勅使惟追陽羨茶內人數減昭陽膳
維揚服製擅江南小閣爐烟沉水含私買瓊花新樣錦

自脩水遞進黃柑中宮謂得君王意銀鐲不妬溫成貴
早日艱難護大家比來歡笑同良娣奉使龍樓賈佩蘭
往還偶失兩宮歡雖云樊嫔能辭令欲得昭儀喜怒難
綠綈小字書成印瓊函自署充華進請罪長教聖主憐
含辭欲得君王愠君王內顧恤傾城故劍還存敵體恩
手詔玉人蒙詰問自來階下拭啼痕外家官拜金吾尉
平生游俠多輕利縛客因催博進錢當筵便殺彈箏伎
班姬才調左姬賢霍氏驕奢竇氏專涕泣微聞椒殿詔

笑譚豪奪灞陵田有司奏削將軍俸貴人冷落宮車夢
永巷傳聞去玩花景和門裏誰陪從天顏不憚侍人愁
后促黃門召共游初勸官家佯不應玉車早到殿西頭
兩王最小牽衣戲長者讀書少者弟聞道羣臣譽定陶
獨將多病憐如意豈有神君語帳中漫云王母降離宮
巫陽莫救蒼舒恨金鎖雕殘玉筋紅從此君王慘不樂
叢臺置酒風蕭索已報河南失數州况經少子傷零落
貴妃瘦損坐匡床慵髻啼眉掩洞房豈菴湯溫水簾冷

荔支漿熱玉魚涼病不禁秋淚沾臆裴回自絕君王膝
苔沒長門有夢歸花飛寒食應相憶玉匣珠襦啓便房
薤歌無異葵同昌君王欲製哀蟬賦誄筆詞臣有謝莊
頭白宮娥暗嚔感庸知朝露非為福宮草明年戰血腥
當時莫向西陵哭窮泉相見痛倉黃還向官家問永王
幸免玉環逢喪亂不須銅雀怨興亡自古豪華如轉轂
武安若在憂家族愛子雖添北渚愁外家已葬驪山足
夜雨椒房陰火青杜鵑啼血濯龍門漢家伏后知同恨

止少當年一貴人碧殿淒涼新木拱行人尚識昭儀塚
麥飯冬青問茂陵斜陽蔓草埋殘壠昭邱松檟北風哀
南內春深擁夜米莫奏霓裳天寶曲景陽宮井落秋槐

琵琶行

并序

去梅村一里為王太常烟客南園今春梅花盛
開予偶步到此忽聞琵琶聲出於短垣叢竹間
循牆側聽當其妙處不覺拊掌主人開門延客
問向誰彈則通州白在湄子或如父子善琵琶

好為新聲須臾花下置酒白生為予朗彈一曲
迺先帝十七年以來事叙述亂離豪嘈淒切坐
客有舊中常侍姚公避地流落江南因言先帝
在玉熙宮中梨園子弟奏水嬉過錦諸戲內才
人於暖閣齋鏤金曲柄琵琶彈清商雜調自河
南寇亂天顏常慘然不悅無復有此樂矣相與
哽咽者久之於是作長句紀其事凡六百二言
仍命之曰琵琶行

琵琶急響多秦聲對山慷慨稱入神同時漢陂亦第一
兩人失志遭遷謫絕調王康並盛名崑崙摩詰無顏色
百餘年來操南風竹枝水調謳吳儂里人度曲魏良輔
高士填詞梁伯龍北調猶存止弦索朔管胡琴相間作
盡失傳頭誤後生誰知却唱江南樂今春偶步城南斜
王家池館彈琵琶悄聽失聲叫奇絕主人招客同看花
為問按歌人姓白家住通州好尋覓袴褶新更回鶻裝
虬鬚錯認龜茲客偶因同坐話先皇手把檀槽淚數行

抱向人前訴遺事其時月黑花茫茫初撥鴟弦秋雨滴
刀劍相磨轂相擊驚沙拂面鼓沉沉砉然一聲飛霹靂
南山石裂黃河傾馬蹄迸散車徒行鐵鳳銅盤柱摧塌
四條弦上烟塵生忽焉摧藏若枯木寂寞空城烏啄肉
輓轡夜半轉呶啞嗚咽無聲貴人哭碎珮叢鈴斷續風
冰泉凍壑瀉淙淙明珠瑟瑟拋殘盡却在輕攏慢撚中
斜抹輕挑中一摘淒慄颼颼慙肌骨銜枚鐵騎飲桑乾
白草黃沙夜吹笛可憐風雪滿關山烏鵲南飛行路難

猿嘯鼯啼山鬼語瞿塘千尺響鳴灘坐中有客淚如霰
先朝舊直乾清殿穿宮近侍拜長秋咬春燕九陪游燕
先皇駕幸玉熙宮鳳紙僉名喚樂工苑內水嬉金傀儡
殿頭過錦玉玲瓏一自中原盛豺虎煖閣才人撤歌舞
挿柳停撈素手箏燒燈罷擊花奴鼓我亦承明侍至尊
止聞鼓樂奏雲門段師淪落延年死不見君王賜予恩
一人勞悴深宮裏賊騎西來趨易水萬歲山前鼙鼓鳴
九龍池畔悲笳起換羽移宮總斷腸江村花落聽霓裳

龜年哽咽歌長恨，力士淒涼說上皇。
前輩風流最堪羨，明時遷客猶嗟怨。
即今相對苦南冠，昇平樂事難重見。
白生爾盡一杯酒，絲來此伎推能手。
岐王席散少陵窮，五陵召客君知否。
獨有風塵潦倒人，偶逢絲竹便沾巾。
江湖滿地南鄉子，鐵笛哀歌何處尋。

雒陽行

詔書早洗雒陽塵，叔父如王有幾人。
先帝玉符分愛子，西京銅狄泣王孫。
白頭宮監鋤荆棘，曾在華清內承直。

遭亂城頭烏夜啼四十年来事堪憶神皇倚瑟楚歌時
百子池邊柳絲早見鴻飛四海翼可憐花發萬年枝
銅扉未啓牽衣諫銀箭初殘淚如霰幾年不省公車章
後來數罷昭陽宴骨肉終全異母恩功名徒付上書人
貴彊無取諸侯相調護何關老大臣萬歲千秋相訣絕
青雀投懷玉魚別昭邱烟草自蒼茫湯殿香泉暗鳴咽
析圭分土上東門寶轂雕輪九陌塵驪山西去辭溫室
渭水東流別任城少室峰頭寫桐漆靈光殿就張琴瑟

願王保此黃髮期誰料遭逢黑山賊嗟乎龍種誠足憐
母愛子抱非徒然江夏漫裁脩柏賦東阿徒詠豆箕篇
我朝家法踰前制兩宮父子無遺議廷論繇來責佞夫
國恩自是優如意萬家湯沐啓周京千騎旌旗給羽林
總為先朝憐白象豈知今日誤黃巾鄒枚客館傷狐兔
燕趙歌樓散烟霧茂陵西築望思臺月落青楓不知路
今皇興念總帷哀流涕黃封手自裁殿內遂停三部伎
宮中為設八關齋束薪流水王人戍太牢加璧通侯祭

帝子魂歸南浦雲
玉妃淚灑東平樹
北風吹雨故宮寒
重見新王受詔還
唯有千尋舊松栢
照人落落嵩高山

宮扇

宣皇清暑幸離宮
碧檻青疏十二重
七寶鑄銅薰鴨貴
千金磁翠鬪雞紅
玳簾開南內宴
沉香匣啓西川扇
蟬翼描來雲母輕
冰紈製就天孫艷
丹霞滃起駕雲輶
王母雙成絳節還
玉管鳳銜花萬壽
銀濤龍蹴海三山
芙蓉水殿琉璃徹
內家尚苦櫻桃熟
九華初御詠招涼

落葉迴風若霜雪峨眉萬里尚方船雉尾千秋奏御箋
公主合歡嬌翡翠昭容反影鬪嬋娟遭逢召見南薰殿
思陵日昃猶揮汗天語親傳賜近臣先生進講幽風倦
黃羅帕捧出雕闌畫簷丹青掌上看俸薄買嫌燈市價
恩深攜謝閭門班自離卷握秋風急蹇驢便面誰人識
聞道烽烟蔽錦城齊紈楚竹無顏色石榴噴火照皇都
再哭蒼梧媿左徒舊內謾懸長命縷新宮徒貼辟兵符
雨夜床頭搜廢篋摩挲老眼王家物半面猶存蛺蝶圖

空箱尚記霓裳疊蠹粉黃侵瓊樹花麴塵香損紫鸞車
珠衣五翟悲秦女玉墜雙魚泣漢家莫嘆君恩長斷絕
比來舒卷仍鮮潔乍可襟披宋玉風不堪袖掩班姬月

宣宗御用戲金蟋蟀盆歌

宣宗在御昇平初便殿進覽幽風圖煖閣才人籠蟋蟀
晝長無事為歡娛定州花瓷賜湯沐玉粒瓊漿供飲啄
戲金髹漆隱雙龍果廠雕盆錦香褥欣飛著翅逞腰身
玉砌軒簷試一鳴性不近人須耿介才堪却敵在標輕

君王暇豫留深意棘門霸上皆兒戲鬪雞走狗謾成功
今日親觀戰場利坦額長身張兩翼鋸牙植股鬚如戟
漢家十二羽林郎蟲達封侯功第一臨淮真龍起風雲
二豪螟蛉張與陳草間竊伏竟何用竈下廝養非吾羣
大將中山獨持重却月城開立不動兩目相當振臂呼
先聲作勢多操縱應機變化若有神僊突彷彿常開平
黃鬚鱗甲見股栗垂頭折足亡精魂獨身跳免追且急
拉折攀翻只一擲螭螭塞外蠕蠕走使氣窮搜更深入

當前拔柵賭先登奪采爭籌為主人自分一身甘瓦注
不知重賞用黃金君王笑謂當如此楚漢雌雄何足齒
莫嗤超距浪輕生橫草功名須致死二百年来無英雄
故宮瓦礫吟秋風一寸山河鬪蠻觸五千甲士化沙蟲
灌莽微軀亦何有捉生誤落兒童手蟻賊穿墉負敗胔
戰骨雖香嗟速朽涼秋九月長安城黑鷹指爪愁雙睛
錦韝玉繚競馳逐頭鵠宴上爭輸贏關鴨欄空舞馬死
開元萬事堪傷心秘閣圖書遇兵火廠盒宣密賤如土

名都百戲少人傳，貴戚千金向誰賭？樂安孫郎好古癖，
剔紅填漆收藏得。我來山館見雕盆，蟋蟀秋聲增歎息。
嗚呼漆城蕩蕩空無人，哀螢切切啼王孫。貧士征夫盡
流涕，惜哉不遇飛將軍。

聽女道士卞玉京彈琴歌

鴛鴦逢天風，北向驚飛鳴。飛鳴入夜急，側聽彈琴聲。
借問彈者誰？云是當年卞玉京。玉京與我南中遇，家近大
功坊底路。小院青樓大道邊，對門却是中山住。中山有

女嬌無雙清眸皓齒垂明璫曾因內宴直歌舞坐中暫
見塗鴉黃問年十六尚未嫁知音識曲彈清商歸來女
伴洗紅粧枉將絕技矜平康如此纔足當侯王萬事倉
皇在南渡大家幾日能枝梧詔書忽下選蛾眉細馬輕
車不知數中山好女光徘徊一時粉黛無人顧艷色知
為天下傳高門愁被旁人妬盡道當前黃屋尊誰知轉
盼紅顏誤南內方看起桂宮北兵早報臨瓜步聞道君
王走玉驄犢車不用聘昭容幸遲身入陳宮裏却早名

填代籍中依稀記得祁與阮同時亦中三宮選可憐俱
未識君王軍府抄名被驅遣漫詠臨春瓊樹篇玉顏零
落委花鈿當時錯怨韓擒虎張孔承恩已十年但教一
日見天子玉兒甘為東昏死羊車望幸阿誰知青塚淒
涼竟如此我向花間拂素琴一彈三嘆為傷心暗將別
鵲離鸞引寫入悲風怨雨吟昨夜城頭吹簫簾教坊也
被傳呼急碧玉班中怕點留樂營門外盧家泣私更裝
束出江邊恰遇丹陽下渚船剪就黃緇貪入道攜來綠

綺訢嬋娟此地繇來盛歌舞子弟三班十番鼓月明絃
索更無聲山塘寂寞遭兵苦十年同伴兩三人沙蘆朱
顏盡黃土貴戚深閨陌上塵吾輩漂零何足數坐客聞
言起歎嗟江山蕭瑟隱悲笳莫將蔡女邊頭曲落盡吳
王苑裏花

南生魯六真圖歌

并引

山東南生魯官浙之觀察命謝彬畫已像而劉
復補山水凡六圖其一坐方褥聽兩姬搗箏吹

洞簫其一焚香彈琴流泉瀉堦下旁一姬聽倦
倚石一會兩少年蹴踘戲毬擲空中勢欲落一
圖書滿床公左顧笑有髻而秀者端拱榻前若
受書狀則公子也餘二圖一則畫藤橋橫斷壑
中非人境公黃冠襖拂棹首不顧一則深巖枯
木有頭陀趺坐披布衲即公也予為作六真圖
歌鏡之石上覽者可以知其志矣

明湖夜雨天涯客握手停杯話疇昔人生竟作畫圖看

拂卷生綃開數尺長身玉立于思翁美人促柱彈春風
一聲兩聲玉簫急吹落碧桃無數紅旁有一姝嬌倚扇
聽君手拂湘妃怨抱琴危坐鬚飄然知入清徽廣陵散
出門逐伴車如風築毬會飲長安中歸來閉門閒課子
石榻焚香列圖史我笑此翁何太奇彈琴蹴鞠皆能為
讀書終老豈長策乘雲果欲鞭龍螭神仙吾輩儘可學
六博吹笙遊戲作不信晚年圖作佛趺坐蒲團貪睡着
丈夫雄心竟若此世事悠悠何足齒興來展翫自掀髯

搜拂藤鞋自茲始劉君水石謝君圖解衣盤礴工揣摩
平生嗜好經想像須臾點出雙清驢置身其間真快樂
聲酒琴書資笑謔縱然仙佛兩無成如此溪山良不惡
吾聞宗少文曾寫尚子平阮生長嘯逢蘇門祖孫妙筆
多天真君不見興宗年少香山老不及丹青似舊人

後東臯草堂歌

君家東臯枕山麓百頃流泉浸花竹石田書畫數百卷
酷嗜平生手藏錄隱囊麈尾寄蕭齋鴻鵠高飛鷹隼猜

白社青山舊居在黃門北寺捕車米有詔憐君放君去
重到故鄉棲隱處短策仍看屋後山扁舟却繫門前樹
此時鈎黨雖縱橫終是君王折檻臣放逐縱綠當事意
江湖還賴主人恩一朝龍去辭鄉國萬里烽烟歸未得
可憐雙戟中丞家門帖淒涼題賣宅有子單居持戶難呼
門吏怒索家錢窮搜廢篋應無計棄擲城南五尺山任
移花藥鄰家植未剪松杉僧舍得漁舟網集習家池官
道人牽到公石礎雖留不記亭槿籬還在半無門款

橋已斷連僵柳醉壁誰扶倚瘦藤尚有荒祠叢廢棘豐
碑草沒猶堪識堦前田父早歌呼陌上行人增歎息我
初扶杖過君家開尊九月逢黃花秋日溪山好圖畫石
田真蹟深谷嗟傳聞此圖再易主同時賓客知存幾又
見溪山改舊觀雕欄碧檻今已矣搖落深知宋玉愁衡
陽雁斷楚天秋斜暉有恨家何在極浦無言水自流我
來草堂何處宿挑燈夜把長歌續十年舊事總成悲再
賦閒愁不堪讀魏寢梁園事已空杜鵑寂寞怨西風平

泉獨樂荒榛裏寒雨孤村聽暝鐘

汲古閣歌

嘉隆以後藏書家天下毘陵與琅琊整齊舊聞收放失
後來好事知誰及比聞充棟虞山翁里中又得小毛公
搜求遺逸懸金購繕寫精能鏤板工繇來斯事推趙宋
歐虞楷法看飛動集賢院印校讐精太清樓本裝潢重
損齋手跋為披圖蘇氏題觀在直廬館閣百家分四庫
巾箱一幅盡三都本朝儒臣典制作累代縹緗輸秘閣

徐廣雖編石室書孝徵好竊華林略兩京太學藏經史
奉詔重脩賜金紫高齋學士費冷錢故事還如寫黃紙
釋典流傳自洛陽中官經廠護焚香諸州各請名山藏
總目難窺內道場南湖主人為嘆息十年心力恣收拾
史家編輯過神堯律論流通到羅什當時海內多風塵
石經馬矢高丘陵已壞書囊縛作袴復驚木冊推為薪
君家高閣偏無恙主人留宿傾家釀醉來燒燭夜攤書
雙眼摩挲覺神王古人闕書借三館羨君自致五千卷

又云獻書輒拜官羨君帶索躬耕田伏生藏壁遭書禁
中郎秘惜矜談進君獲奇書好示人雞林巨賈爭摹印
讀書到死苦不足小學雕蟲置廢簾君今萬卷盡刊訛
邢家小兒徒碌碌客來詩酒話生平家近湖山擁百城
不數當年清秘閣亂離踪跡似雲林

送志衍入蜀

去年秋山好君走燕雲道今年春山青君去錦官城秋
山春山何處可為別把酒欲問橫塘月人影將分花影

稀鐘聲初動簫聲咽我昔讀書君南樓夜寒擁被譚九州動足下床有萬里驚馬伏櫪非吾儔當時東國賤男子傲岸平生已如此今朝乘傳下西川賓戶已人負弓矢黃牛喘怒濕銀濤崩剝蒼崖化迹勞石斷忽穿風雨過山深日見魚龍高江頭老槎偃千尺接手猿獠擲橡栗雲移斷壁層波見月上危灘遠峰出縹緲樓臺白帝城月明吹角唱花卿棧連子午愁烽堠水落東南洗甲兵摩訶池上清明火蹲鸱山下已渝舞豈有居人浣百

花依然風俗輸銅鼓有日登臨感客游
楚天飛夢入江樓五湖歸思蒼波濶
十月懷人木末愁別時曾折閭門柳
相思應寄郛筒酒未下鹽豉誰共嘗
蜀中蒟醬君知否愧予王粲老江潭
愁絕空山響杜鵑乞我灤西園數畝
依君好種灌溪田


清風使節圖吾郡先達徐仲山中丞
以武部郎奉命封鄭藩當時諸賢贈行
作也中丞於先叅政為同年勿齋先生
屬予記其事勿齋勅使益府予亦

有大梁之後兩家子弟述先志揚祖德其同此君

歲寒矣

豫章夾日吟高風歲久蟠根造物功吾祖先朝豫州牧
早年納節東溪翁舅家仲珪擅畫竹歸老山莊看亦足
至今遺墨滿縹緗掛我青溪草堂曲此圖念出同年生
當時意氣稱徐卿非買玉環思適鄭暫持翠節解司兵
吾祖一麾方出守不獲諸公同載酒把臂曾看韋曲花
贈行不及漳河柳誰人尺幅寫貧簪影入清郎四牡裝

千里故園存苦節百年舊澤養新篁
今皇命使臨江右絳旂人識中丞後
江左龍孫篠蕩長淇園鳳質琅玕瘦
嶰谷千尋鸞鳥呼彭城一派雨風多願
將十丈鵝溪綃
再作青青玉筍圖



梅村集卷四